

TIBÍAMAN LIGÁRADAN PÁBLO LUN TIMOTÉO

Labúrüjan Páblo lun Timotéo

1 ¹Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu. ²Nabúrüjañoun gárada to bun, Timotéo le nanúgübei queísi niraí le jínsiñebei nun, resíbibá abíniruni, gudémejabu, lúma darángilaí lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³Dan le nayúmuragun lun Búngiu buágu ságü nayúmuragun árie bu lúma wéyuagu, teínqui numúti Búngiu le únbei nesériwida láu tarúma nanígi quei jadúgüni binádu nagúbürigu. ⁴Súnwandan naríttagun luágu bayájun dán meja le nígirunibu, buséntina jamúga naríjinibu lun nabuínchun láu ugúndani. ⁵Jaríttaguatina luágu afíñeni inárüniti le buágubei, Lóida to bagúttü, túma Euníce to búguchu, jagía meja gawágubalin afíñeni le furúmiñe, áni choúru numúti luágu njein lan gíñe buágu.

⁶Ligia naríñagunbei bun lun bayúsuriñe méme ubáfu le líchugubei Búngiu bun dán meja le níchugunbalin nújabu bábulugu. ⁷Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadúgüni furúmieguarügü cátei, ínsiñeni, lúma ubáfu lun wasáminarun buídu líchugubei woun. ⁸Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürúbei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹Sálba lumútiwa Búngiu, wa ligía woun lun wanúgün ában ibágari le derégewati lun, máma jamúga lueígiñe njein lan cátei buíti wadúga, ladúga ítara líña lan laráanseruni lubáragiñe ladúgüni ubou lun larúfuduni lareídun lúma línsiñejabun woun lídaangiñe Jesucrístu. ¹⁰Guetó larúfudei ínsiñeni le láu loúnajani Jesucrístu le

Wasálbaragüle lun lagúnrinchaguni lubáfu oúweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña juríu. ¹²Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níchigei naffínen, áni choúru numúti luágu gabáfu lan lun loúnigiruni le líchugubei lábugiñe nariaajan daríme lachúlürün wéyu ligía lun lagíribudun Crístu uboúagún.

¹³Mígirabeí luwúyeri arúfudajani jarúmati le níchugubei bun, abágaridabá láu bafínen luágu Crístu, arúfudeina ínsíneni joun súngubei ladúga lídaañadiwa ában lúma Jesucrístu. ¹⁴Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríaaajan lun madarúniwa lan iyéeni lídoun.

¹⁵Queísi basúbudiruni, ígira jamáadina sun afíñetiña Ásiana nábugua, níjein Figélo jádan, lúma Hermógenes. ¹⁶Gudémejabulá Búngiu joun lufámilian Onesíforo, lugúndun barújeiti gurásu nun sarágu weíyaasu, úati gíñe nibúsigari lan láu nadaürúña lan, ¹⁷lubáragiñe líra, dan le liábinbei ubúrugú Róma, merédeti láluajanina darí ladárirunina. ¹⁸Darí lámugei lugúdemejabu Búngiu lídaanme wéyu ligía le lagíribudagüle Wabúreme Crístu uboúagun. Subúsiti gíñe bun buídu ída líña lan líderaguníwa ubúrugú Éfeso.

Ában lisúdaaran Jesucrístu buíti

2 ¹Ánjeinti amúrrü, niraü, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ²Le cátei lánina waffínen le agáamba báalibeí nariñagun jagíbugiñe sarágu gefeéntiña arúfudajabeí joun wügúriña ja afíñewati jawágu, ja gayáarati jarúfudajani joun ámu.

³Awándabeí lubeíti sáfuri quei ában lisúdaaran Jesucrístu buíti. ⁴Úati súdeara le esériwiduti ádaraguti lúngua lídoun ámu cátei lueí le lánina súdeara, lugúndun gásu leréderun dayárugú lábugiñe lerénjan lugúmandan. ⁵Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶Le ábunagubei, garíchatí lun ligía lan furúmiñe ibíjei lufánran lídaangiñe alúbajani. ⁷Samínabá luágu úrüwa jémpulu le, ábame gunfaráandagüda láni Wabúreme súngubei bun.

⁸Jarítaguabá luágu Jesucrístu. ligía ában gürígia wáledi, jádan linébaanfaangu urúei Dávid, áni sarágüda lumúti Búngiu lídaangiñe oúweni. ⁹Niján ugánu le lánina asálbaruni le napúrichijabeí, áni lueígiñe napúrichijani, awándatina asúfuriruni darí lun nagúrawagún láu güríngüri camá ában gürígia wuríbatí áu. Siñáti leréderúniwa labúruchagun láni Búngiu ugánu, ¹⁰ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweíríguni magúmuchaditi siélu ladúga lídan jamá ában lúma Jesucrístu.

¹¹Inárüni cátei le.

Ánjein jiláadiwa lubeí lúma Crístu, wabágariduba gíne lúma,

¹²ánjawa awánda súfuri lueígiñe, gafánraanbadiwa lídan larúeijan.

¹³Ánjawa múaran, ligía úaramemebei, lugúndun ítara liña ligáburí Búngiu.

Ában ñadágimeinti buíti

¹⁴Jarítaguagüdadeí cátei le joun ja afínebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añáwurijarügü lumútiña ja agáambajabaña.

¹⁵Jóuchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu. ¹⁶Díseba lueí dimúrei buri málati le lánina uboú le, lugúndun ja adímurejabaña ítara, jóú dintimaña lídoun wuríbani, ¹⁷ábame labúruchagun jarúfudajan quei cánser. Niján le susérebei lun Himenéo lúma Filéto, ¹⁸ígira jamáali inárüni, jaríñaga luágu sügújali lan lidáani ásaaruni lídaangiñe oúweni, jagúnrinchaguñeiti jafíñen sarágu güri-gia ítara. ¹⁹Wagía afíñetiña, wagía lilígilisin Búngiu láu ébuu derégüdati le rúlaalíbei Búngiu, siñátí lánjingichúniwa. Búrúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun lueí wuríbani.”

²⁰Tídan ában múna weíritu, máma rügúñein umégeni gólu o pláta ñi, níjein gíne le láuti fuláansu lúma láuti múa, níjein lúnti luweírin-ágei ayúsuruni, níjein lúnti furúmiegua-rügü yúsu. ²¹Lun lúnti lan ában ayúsuruni weíriguti ában güri-gia le derégeguati lúngua lun Búngiu, ju ligía lun, lúnti jarúma lan libágari, díse ligía lueí sun le wíyebei, ítara lúba ju lan lun furúmiegua-rügü wadágimanu buíti.

²²Anúrajabá lubeíti lueí jayúmajan wügúriña ñúbürigiña, barúba ában ibágari le lánina ísuruni, afíñeni, ínsiñejabuni, lúma darángilaü, úara jama sun ja agúarubalin Wabúreme Crístu táu anígi jarúmatu lun líderaguniña. ²³Madúgabá gásu láu sigénei málati, subúdi báali luágu barú lan líra wuríbu. ²⁴Moún lumuti gádan lání wuríbu ában esériwiduti lun Crístu, lubáragiñe líra, lúnti buídu lan jama sun güri-gia. ²⁵Lúnti ában lan arúfudajati buíti ligía, lúnti gagúraasun lan jama ja múaradúntiña lúma, lúnti larúfuduni joun táu anígi únabugutu luágu marícha jamá, ladúga gayára lan lasáansiruni Búngiu ligáburí jasáminarun lun gayáraabei lan jánjarun lun le inárünibei. ²⁶Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladúgüni labúseerun jáu.

Ída jába lan güri-gia lídoun búrime lagúmujoún wéyu

3 ¹Lúnti gíne basúbudiruni luágu liábin buríba lan wéyu jénrenguti lídounme lagúmujoún dan. ²Jóungua rügúbei buri güri-gia jabúseera buíti, jínsiñe seínsu joun, pánta jagía, barúgua jóungua. Jadímurejaba

wuríba luágu Búngiu, magáambun jabáña jagúbürigu, meteíngiradibaña, minébeme cátei lánina Búngiu joun. ³Mínsiñejabubaña joun jarájüñü, magúdemejabu, marásualugubaña, siñábei jártügüdagun joúngua, janárimebaña, láganibaña sun le buídubei. ⁴Jalúgurubaña jamádagu, jadúgüba buri cátei mabuídunti mebéresenga jagía cába lan asúsereda lárigiñe, janárimabei janáangun joúngua, jáluajabei jagúndan guánarügü lubáragiñe jamúga jáluajani Búngiu. ⁵Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe gürgía ja. ⁶Jádan buri gürgía ja, añájein já buri ebélurubaña jábiñoun mútu ayéedaña würiña ja débilitiña, já buri buínbaña láu figoú lúma láu sun luwúyeri ayúmajani. ⁷Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸Ítara quei jawúgürjoun Jánes lúma Jámbres, ja gabíñarajadibaña, lun Moisés, ítara líña gíñe jawúgürjoun wügúriña ja lun inárüni. Wügúriña buri ja, wuríbati jasáminan, garábaguaaña luágun wafíñen. ⁹Mawáanserunbaña sarágu, ladúga geféenbei sun uboú luágu ibídiougua lan jáu, quei lasúseredun joun bián jagúra ja awúgürjioúbaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰Ánjein amúrü, falábaali narúfudajan buídu lúma ligáburi nagáburidun. ¹¹Subúdi báali narítangun lúma nafíñen, aríja báali nugúraasun lúma nísíñejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúrugú Antioquía, Icónio lúma Lístra. Subúsiti gíñe bun ída líña lan leséfurunina Wabúreme Búngiu lídaangiñé buri sun cátei le. ¹²Inárüni luágu jeíbaajoúba lan sun ja busénbaña jabágaridun derégeguañu joúngua lun Jesucrístu. ¹³Ánjaña ja wuríbabaña jáma ja gayéejadibaña, jaríbadatimaaba, ítara mémejaba ayéeja lúma ayeedúa.

¹⁴Ánjein amúrü, ítaramemebá derégüdagu lídan le bafúnrendeirubei, le uágubei afíñeedibu lan. Subúdi bumúti luágu inárüni lan le bafúnrendeirubei ladúga gayára lan bafíñerun jawágu ja arúfudajabalin bun. ¹⁵Subúdi bumúti Lerérün Búngiu lúmagiñe nûraügídibu. Tídan Lerérün Búngiu, ladárirúa sun lichú áu le busénwabei lun gayára lan jasálbarun gürgía, láu jafíñerun luágu Jesucrístu. ¹⁶Sun le bürúwañubei tídan Lerérün Búngiu, Búngiu guánarügü íchugubalin jarítangunrugun wügúriña lun jabúrüdüni. Jútu líburu tugúya lun tarúfuduni le inárünibei lúma gíñe lun tarúfuduni le maríchabei, adúgatu lun jígiruni gürgía cátei le mabuídunbei luágu le buídubei, arúfudajatu joun gürgía lun jabágaridun surúñu. ¹⁷Líburu tugúya, jemégenboun gürgía ja esériwidubaña lun Búngiu lun jadúgüni sun luwúyeri wadágimanu le lúnbei jadúgüni lun.

4

¹Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangaña jáma jiláguaaña, naríñaguña bun lun

bapúrichijani Lerérun Búngiu, ²aráanseñubá lun bapúrichijani, busén jagía gürígia jagáambuni, mabúseerun. Afñegüda báña, adeñjabá, eréra amúriime, arúfudajabá joun láu gurásu. ³Lugúndun lachúlürüba dan dánme le mawándun jamáni gürígia arúfudajani jarúmati, lubáragiñeme líra, jáluajabei arúfudajani le gúnfulibei lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerúbei jagáambun joun. ⁴Jíchugubei janágan luágun inárüni, ábame jadúgün gásu láu sun luwúyeri úraga. ⁵Ánjein amúri, buídulá bisáminan súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶Áu, sandíguatina núngua luágu nadúgüñein lan lagúmujoún le nuáraati lun Búngiu, yaráfaali lórate noúnwen. ⁷Ageíndagua náali luwúribun Crístu buídu, eibaguaadina chülú lúmoun lébeja, adúga náali sun le rúlaalíbei Búngiu nun lun nadúgüni, areída náali arúfudajani le lánina wafñen jarúmañu.

⁸Guetó, lagúrabuñadina nafáyeiruaja le lebégi ában ibágari le lánina ísuruni, afáyeiruajau le lúnbei líchuguni Nabúreme nun, le agúseragüdüti le úraguabei, lídaanme wéyu ligía. Áni mámarügüba nun líchigei afáyeiruajau ligía, líchugubei gñie joun sun ja agúrabajabaalin liábin láu ínsiñejabuni lun.

⁹Jouchabá biábin aríjana furése. ¹⁰Ígira láadina Démas, jñsiñetimaati cátei le lánina uboú le lun, ñúdünjati ubúrugun Tesalónica. Ñúdünja Crescénate loúbawagun Galácia, ñúdün Títo loúbawagun Dalmácia. ¹¹Lúcas rügüñein núma ya. Áluajabeí Márcos, banúgeime búmagua, gayáraabei líderagunina lídan wadágimanu. ¹²Oúnaja nan Tíquico ubúrugun Éfeso. ¹³Dánme biábin, banúgounme cápa to nígiruboun lúbiñe Cárpo yágüta Tróas nun, barúbounme gñie buri líburu, nigáradan burítima. ¹⁴Adúgaali Alejándro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladúgübei. ¹⁵Toúnigiguabá búngua lueí, lugúndun garábaguaali luágun ugánu le wapúrichijabei.

¹⁶Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina súngubei. Agúrabatina lun mabájüdüni láni Búngiu cátei le joun. ¹⁷Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüthaneí joun sun gürígia ja mámabaña juríu. Ítara líña leséfurunina Nabúreme lueí yebe ouweni, ¹⁸áni leséfurubadina lueí sun wuríbani, areída láname lubá larúeijan siélu. ¡Rúalá uweíriguni lun súnwandan! Ítaralá.

Lagúmujoún buri mábugaü lúma abíniruni

¹⁹Mábugaü tun Prísca lúma lun Aquíla lúma joun lufámilian Onesíforo. ²⁰Reídeija Erásto ubúrgu Corínto, ígira numúti Trófimo láu sándi Miléto. ²¹Jouchabá biábin lubáragiñe laríbougadun. Mábuga líña Eubúlo bun, Pudénate, Líno, Cláudia jáma sun wadújeñu lueígiñe Jesucrístu. ²²Búma lámuga Wabúreme Jesucrístu, biní laúnme Búngiu sun jugúya ja alíjibarun gárada to. Ítaralá.